

Vniuerselle, liure III.

La bataille donnée aupres de la ville de Granfon.

503

L'An de salut 1476. apres le iour de nostre Dame de la chandeleuse le duc de Milā enuoya au duc de Bourgoingne 15. mille hommes, & la duchesse de Sauoye 5. mille & toute ceste compagnie s'en vint à Lausanne, ou le Duc estoit, car le Duc estant là venu avec grande armée auoit par surprinse opprimé ceste ville, là, &c. Les habitantz ne voyantz nul ayde pour resister si soudainement contre vn ennemy si fort & si bien acompagne & garny, furent estonnez & se rendirent. Or apres ceste prinse de Lausanne qui estoit confederée aux Suysses, iceulx tout soudain apres auoir faict leur monstres marchēt contre luy, ayantz premierement enuoyé garnison es villes qui estoient plus prochaines de leur ennemy: Il y auoit garnison de quatre cens Suysses en la ville de Granfon. Le 12. iour du mois de Feurier le duc de Bourgoingne assiegea la ville & le chasteau de Granfon avec cinquante mille hommes, & ayant aussi amene cinq cens pieces d'artillerie avec luy il commença à assaillir la ville, & au premier assault il perdist cent hommes. Les Bernois qui estoient en garnison voyantz ce qui pouoit aduenir, bruslerent la ville, & se retirerent au chasteau. Le duc donc commença à assaillir le chasteau à grans coups de canon, & en tomba d'vn costé & d'aultre. Il sollicitoit aussi ceulx qui estoient assiegez de se rendre, & uoyant qu'ilz ne se uoloyent point rendre sinon qu'il les receut à mercy, il leur promist ce qu'ilz demandoient, qui fust cause qu'ilz se rendirent. Estāt donc saisy du chasteau, il print tous ceulx qui y estoient en garnison, il en feit prendre octante, & noyer deux cens au lac qui estoit là pro-

*Les Suysses
penduz &
noyez.*



chain, & les autres furent retenuz prisonniers. Vn tel acte meschant esmeut grandement toutz les hommes de la haute Germanie, & non seulement les Suysses: parquoy ilz assemblerent toutes leurs forces pour venir contre le duc, asçauoir les Suysses, l'armée du duc d'Autriche de laquelle Herman d'Espingen estoit conducteur, l'euesque de Basle, l'euesque de Strasbourg avec leurs armées, & pres de la ville de Granfon, il le chasserent de son fort, & apres qu'il fust chassé, la plus grand partie de son armée fust tuée. Lors il perdist tout son appareil de guerre, qui estoit fort magnifique, toute son artillerie, trois cens cacques de pouldre à Canon. Adonc les Suysses recouurerent toutes les uilles & fortresses que le duc de Bourgoingne auoit saisies, & despendirent toutz leurs compaignons qu'icelluy auoit faict pendre, & les enterrent, & prindrent tous les Bourguignons quel le duc auoit laissez en garnison, & les pendirent des licolz mesmes desquelz les Suysses auoyent esté penduz. Or le duc se retirant de ceste fuyte, s'en uint la premiere nuit loger à Yuerdon, & puis a Nozererh, & estoit si triste qu'il ne uoloit ne boire ne manger, & s'en uint finalement à Lausanne, où ilr' allia les gentz. Il enuoya aussi postes &

*La premiere
desfaite du
duc Charles.*

messagers au pays de Flandre & autres lieux & ambassadeurs pour amasser nouuelle armée & gentz fraiz, & feit une taille sur les Bourguignons de la 6. partie de leurs beins pour faire ceste guerre, d'auant qu'il auoit deliberé de pleinement obtenir la uictoire ou de perdre entierement & sa persone & toutz les gentz. Tāt estoit il trouble d'ire & agitē de diuerses affections, qu'il n'auoit nul esgard à la despense, qu'il faisoit à tout ce qu'il entreprenoit. La duchesse de Sauoye luy uolur enuoyer 4. mille hommes pour le secourir, mais les Frisbourgeois uindrent deuant, & les feirent retourner en arriere. Il y auoit aussi quelque compagnie de Lombardz qui tenoyent au secours du duc & descendoient par le mont Sainct Bernard pour entrer dedans le pays de Vualaz, lesquelz tuerent bien six uingts hōmes du pays, dequoy les Vualesiens furent si irritez, qu'ilz s'assemblerēt & tuerent mille Lōbardz, & meirent le reste en fuyte. En ces entrefaictes l'empereur Frideric traualloit à faire la paix entre les Suysses & le duc de Bourgoingne.

Rt 5 Labataille